

PRÆFATIO.

JAM dudum, et antiqui Codicis exemplarium penuria, et Chymicarum rerum incrementum, et inde nata lingue novæ necessitas, auctaque medicamentorum potentium suppellex, novam requirebant medicamentarii Codicis editionem, refertam quidem minori compositionum turbâ, simplicium autem confectione emendatiorem et auctiorem.

Ad hoc opus, jubente non semel summo rerum internarum regni administro, ut sese accingeret Medicinæ Facultas Parisiensis, elegit, quibus Codicis hujus conficiendi curam committeret, Professores *Le Roux* decanum, *Deyeux*, de *Jussieu*, *Vauquelin*, *Richard*, *Percy*, *Hallé*; et Scholæ Pharmacopœorum Parisiensis operam quoque invocavit, à quâ lecti fuerunt Scholæ ipsius Professores *Henry*, *Vallée*, *Bouillon-Lagrange*. Labordum incumbent omnes, medio in opere, fato miserè cessit unus è Pharmacopœis *D. Vallée*, in cujus locum suffectus est *D. Cheradame* ejusdem Scholæ antiquior socius et quaestor.

Symbolam ad opus perficiendum unusquisque contulit suam, non consilio tantum in consessibus, sed et proprio quisque labore propriâque experienciâ.

Primas operis lineas jam adumbraverat *D. Deyeux*; inceptique hujus capita et sectiones primò omnium simul examini subiciebantur bis in hebdomade.

Experimenta deindè non pauca, ad Pharmaceuticam, ad Medicamentorum naturam meliùs perspicendam, et ad

Methodum quâ singula consociari in formulis præscribique possunt, utilia peregerunt DD. *Henry, Vauquelin, Vallée* et alii. Quæcumque experimenta attulimus, nullo auctoris addito nomine, à D. *Henry* peracta sunt.

Materiae Medicæ catalogum susceperunt DD. de *Jussieu, Richard, Vauquelin, Henry*.

Alii plurimi Medicos inter Pharmacopœosque Parisienses viri, operi quoque benè consuluerunt; quos inter DD. *Boudet, Guilbert, Duchâtelle, Baruel* nominare æquitas est. Plurima hausimus ex collectaneis quibus titulus est *Bulletin de Pharmacie*, ac nuperrimè *Journal de Pharmacie et des Sciences accessoires*, inter omnia quæ in hunc censum referri debent, nulli certè postponendum opus. Multa ex scriptis, programmatibus, dictisque D. *Chaussier* optima mutuavimus, cujus societate atque operâ, ignotum quo fato, carere debuimus. Non pauca etiam utilia ex scriptis *Baumé, Parmentier, Planche, Boulay, Robiquet, Cadet, Pelletier, Virey, Swediaur* et aliorum excerpsimus; plura prætereà ex Pharmacopœis exteris recentioribus, præcipuè *Suecâ, Berolinensi, Batavâ, Petropolitanâ, Londinensi, Edinensi*, speciatimque ex D. *Niemann* ad Pharmacopœam Batavam *additamentis*, quorum ope fruimur quodam veluti Pharmacopœæ universalis specimine, quod quibusdam certè mendis non caret, sed plurimis refertum est utilibus, non quoàd copiam tantum, sed etiam quod Medicamentorum analysim spectat, iudiciumque sæpè non parvi faciendum doctissimi viri.

Ordinis demùm totius latinitatisque cura commissa est D. *Hallé*, cui sociam contulere operam de *Jussieu, Richard* et alii.

Singulorum et omnium opus, ut conficiebatur, in concessibus perlectum, perpensum et emendatum, typis demùm committendum jussit summus rerum internarum regni administer, voluitque, Rege optimo annuente, titulum operi inscribi: **CODEx MEDICAMENTARIUS SIVE PHARMACOPOEA GALLICA** (*). Typorum curandorum provinciam demandavit idem D. HACQUART, Parisiensi Typographo; utque exemplaria typis primùm cedebant, novo rursùs erant examini subjecta; novisque uti demùm absoluta videbantur emendationibus, prælo mandabantur.

Præcipuus Codicis hujus finis cum sit, ut eadem ab omnibus methodo confecta medicamina, ubique et semper similia habeantur, et sibi perpetuò constent; ordo in eo exarando necessariò desumptus est ab ipsis Pharmaceuticis operibus. Adeòque in Sectiones decem partitum est opus; quarum hi sunt tituli:

1°. PRÆPARATIONES MEDICAMENTORUM SIMPLICIUM ET CAUTELÆ PHARMACEUTIÆ; cujus sectionis capita sunt:

Delectus, Exsiccatio, Asservatio et Renovatio, Purgatio et Mundatio, Dispositio et Aptatio, in Pulverem Resolutio.

2°. MATERIÆ È SIMPLICIBUS INTEGRIS, ELEMENTIS PARUM IMMUTATIS DEPROMPTÆ; talia sunt.:

Succi expressi, Fæculæ, Olea expressa, Pulpæ, Serum Lactis.

3°. MATERIÆ IN SIMPLICIBUS FERMENTANDO EVOLUTÆ; Unico impletur capite, unicoque exemplo *Vino ex Hydro-melite.*

(*) Bulletin des Lois, 1816, 106, Ordonnance, n° 1005.

4°. MATERIE EX SIMPLICIBUS DESTILLANDO ELICITE; huc referuntur

Aquæ stillatitiæ, Olea volatilia odorata, Alcohol et Alcoholata, Sales et Olea volatilia pyrogenæa.

5°. SOLUTIONES MEDICAMENTORUM VARIIS LIQUIDIS PARATE; inter quæ numerantur quæcumque solvuntur

Aquâ, Vino et Cerevisiâ, Aceto, Oleis, Alcoole, Æthere, variis liquidis cum Saccharo aut Melle.

6°. MATERIE È SOLUTIONIBUS INSPISSANDO EXTRACTE; hoc sub titulo habentur

Mucagines, Gelatinæ, Extracta, Resinæ.

7°. MEDICAMENTA PER ANALYSIM CHYMICAM È CORPORIBUS ELICITA; qualia sunt

Acida, Alkalia et Subcarbonates Alkalini, Metalla et Oxida Metallica, Sulfur, Phosphorus, Carbones.

8°. MEDICAMENTA PER SYNTHESIM EX UNITIS PER CHYMICAS AFFINITATES ELEMENTIS COMPOSITA; hic exponuntur operationes quibus conficiuntur

Ætheres, Acida Alcoholisata, Sales, Sulfureta, Sapones, Aquæ Minerale arte factæ.

9°. MEDICAMENTA EX MIXTIS TANTUM SIMPLICIBUS AD USUM PRÆCIPUÈ INTERNUM CONFLATA; talia sunt

Species, Pulveres compositi, Massæ molliores, Conservæ, Tabellæ, Electuaria et Opiatæ, Pilulæ et Boli.

10°. MEDICAMENTA MISTIONE AUT FORMA AD USUM EXTERNUM PRÆCIPUÈ DESTINATA; in hunc numerum recensentur.
Cataplasmata, Fomenta, Collyria, Linimenta, Cerata, Adipes medicati, Unguenta Oleoso-Resinosa, Unguenta

solida et Emplastra, Telæ medicatæ et Cereoli et Glandes suppositoriæ, Escharotica et Cathæretica, Suffumigationes.

His sub titulis, suo quæque ordine et numero, Formulæ Medicamentorum variæ dispositæ sunt; et huic divisioni præfixus prætereà est Materiæ Medicæ, è Vegetantibus, Animalibus, Mineralibusque desumptæ CATALOGUS.

Ac primùm in MATERIA MEDICA, singulorum characteri breviter è Botanicis, Zoologicis, aut Mineralogicis scriptis desumpto, quantum licuit, addimus peculiare sinceritatis notas, ubicumque aliquis aut error, aut fraudi posset esse locus.

In istà quoque conficiendâ hujus operis parte, cum inter nos ambigeretur nùm in hunc censum ea tantùm essent conscribenda, quæ usu quotidiano hodiè comprobata sunt, an potiùs plura etiam antiquiùs usurpata, quantumvis nunc aut neglecta, aut despecta, admitterentur; re attentius consideratâ, credidimus non parvi interesse ad utilitatem virorum nostrorum veterum scripta legentium, aut observata apud exterâs vel et remotissimas gentes revolventium, si quæ in tantâ temporum locorumque varietate accepta fuerunt, cum nostris eodem in catalogo recensita intueri, et nominum compositâ diversitate interpretari liceret. Prætereà hodiè quoque vidimus non pauca dudùm aut deserta, aut contempta, aut reformidata, atque ideò rariùs adhibita quasi cecidisse, nostris denuò temporibus in usum fuisse revocata; ut de *Lichene*, *Violâ tricolore* quibusdam *Jacéd* dictâ, *Narcisso*, sed præcipuè de *Cicutâ*, *Arnica*, *Digitali*, *Aconito*, *Anemone pulsatillâ*, *Belladonâ*, *Strychno*, etc. satis notum est. Neque minùs interest numerum

et nomina nosse quorundam, quæ uti succedanea in eorum locum quibus utimur, si quando deficient, suffici valent. Neque ea quæ ad chymiam aut œconomiam tantum pertinent omninò silenda credidimus. Superfluitatem igitur maluimus quàm inopiam.

In *Formulis* autem *conscribendis* eam nobis curam præcipuè impositam esse credidimus, ut incertum nihil ambiguumve præ se ferret, aut Medicamentorum quæ natura ipsa suppeditat apparandorum ratio, aut ars ea conficiendi quæ Pharmacopœorum industriâ enascuntur, aut methodus ea miscendi quæ in compositis non inconditè neque promiscuè consociari debent.

Hæc inter præparata, alia sunt quæ in officinis præstò esse debent et OFFICINALIA dicuntur, alia quæ Medico præscribente ex tempore ut plurimum apparanda sunt, et dici solent MAGISTRALIA. Verùm hæc ipsa, ut medicus pro indicationum ordine disposita plerumque enuntiat, non eadem tamen lege à Pharmacopœo, sed pro elementorum quibus constare debent analogiâ consociari convenit, quorum scilicet compositio Chymicis subjacet necessariò legibus. Ideòque nonnulla magistralium exempla contulimus, non quæ medentum sagacitati, sed Pharmacopœorum solummodò diligentia proponeremus, ut indè pateret quænam in similibus, pro re natâ, exequendis perficiendorum norma esset utilior. Hujus censûs ea sunt propè omnia, quæ inter solutiones aquosas recensuimus, plerasque mixtureum præferentia varietates, ut vario quæque modo et ordine conficienda sunt.

Quod autem OFFICINALIA spectat, alia simplicia sunt, alia ex pluribus composita; quæ seorsim in singulis sectio-

num capitibus generatim seposuimus. *Composita* autem ea tantum admisimus, quæ frequentius apud Pharmacopœos nominatim aut à medentibus ipsis, aut à vulgo quotidie requiruntur. Quantumvis enim multa ex hoc medicamentorum Catalogo expungenda primo intuitu viderentur, ut simplicioribus locum darent, nostri juris esse non credidimus iis quasi interdicare, quæ adhucdum in usu quotidiano sunt, et ab ipsis artis antistitibus sæpius requiruntur. Quædam igitur, pauca tamen, servavimus; neque ea temerè, pro arbitrio ut plurimum immutanda censuimus, nisi in iis quæ ipsi Pharmacopœorum arti propria sunt; etenim injustè factum certè videretur, si cuius medicamentum poscenti daretur aliud, quàm quod ipse suscepisse credat. Theriacam igitur et similia in officinis apud nos non prostare quis sustineret, et si prostant, cur non esset sancitum quâ lege debeant confici? Quantumvis igitur aliter sentierint exterarum Pharmacopœarum conditores, servanda adhucdum nec temeranda credidimus ea, quæ tum à medicis, tum à vulgo ipso sæpius usurpari solent.

Verumtamèn, dum ista consuetudini concessimus, ut faveremus quoque simplicitati, in maximè compositis notavimus ea quæ præcipuam vim toti medicamento conciliant; et ipsa hæc vel titulo inscripto, vel litterarum differentiâ, vel peculiari annotatione ità indicavimus, atque insuper eorundem rationem ad totam compositi molem sic statuimus, ut è multiplicibus simplicia ejusdem virtutis facile, pro lubitu, erui possint. Sic in ipsis magni nominis farraginibus seu Electuariis, ut *Diascordio* et *Theriacâ*, turbam simplicium ordinatam, et in summas, pro varietate virium, glomeratam ità digessimus, ut totius hæc methodo

quasi medica analysis haberetur. Et præterea in antiquissimâ omnium Theriacâ, Chymicam quoque elementorum analysim, D. *Guilbert* industriâ comparatam, addidimus. Illa etenim quæ apud antecessores laudis magnæ viros diù accepta sunt, et adhucdum à coætaneis plurimis utiliter usurpantur, perspicere præstantius certè est, quàm despiciere.

Præter hæc Composita, antiquitûs in Codicibus conscripta, neque in praxi obsoleta, paucissima quoque ab exteris Pharmacopœorum Codicibus utilia mutuavimus. Nec non et alia, inter arcana quædam usitata, vulgò in officinis prostantia, quæ nunc aut nobis certò innoscere, aut analyseos ope sat plenè detecta sunt, juris publici faciendâ credidimus, ne temerè utentibus periculum impenderet ignoti aut incerti medicamenti. Hoc scilicet publicæ securitati dandum duximus. Neque certè cuiquam videbitur ingenuum hoc, aut conveniens Medicorum Pharmacopœorumve dignitati, si quis illorum, qui se salutis publicæ devotos profitentur, quædam arcana propria sibi servaret venditaretque, lucri causâ, turpis in autorem, in commune bonum periculosi.

Cæterum, nisi necessitas, et usus, et consuetudo urgent, rectiùs certè, paucis exceptis, compositorum pleraque à Codicibus nostris exularent. Scilicet meliùs profectò consuleretur et ægris et arti, si non aliis uteremur, quàm quæ, apta loco, et constitutioni et conditioni ægrotantium, singulatim et convenientiùs à medico, pro re natâ, concinnarentur et præscriberentur.

Ea nos idcirco, præ ceteris, sollicitavit cura, ut *Simplicia* quæ sub ipsis artis operibus enascuntur, pura promantur sinceraque, atque elementorum, quibus constant,

ratione non leviter perspectâ. Indè enim et eorum ipsorum certior vis atque utilitas, et compositorum in quæ coalescunt conditio perfectior evadit. Talia certè, ob nova Chymicæ artis incrementa, hodiè à nobis maximè requirebantur. Indè factum est, ut, in exponendis modis operandi, incusationem simul veriti non tam prolixitatis, quàm incuriæ. Multa adeò sæpiùs experiendo ipsi tentavimus confeci nusque, atque in his præcipuè D. *Henry*, in magna nosocomiorum officinâ, præstò fuit cura et solertia. Sic in Tincturis seu solutionibus aut Alcoolicis, aut Æthereis, non Alcoholis tantùm densitatem ex areometro, sed solutæ materiæ rationem analysi comprobata, sedulò indicavimus.

Ad id etiàm multa nostris temporibus neotericorum inventa nos adduxere, ut quædam aut indigitaremus rursùs neglecta diù atque prætervisa, aut antè conjuncta secerneremus, quæ verè inter se differunt, et ea novis medentium tentaminibus objiceremus. Hoc autem imprimis præstitimus et in Opii extractis diversimodè paratis, et in Oxidorum Saliumque Metallicorum nonnullis varietatibus, præcipuè Ferri, Hydrargyri, Stibii, Zincique, tanti medicis in rebus momenti, variæque adeò, pro singulorum statu, efficacis. Titulos ideò, veræ singulorum naturæ indices, præter nomina vulgaria, cuique præfiximus, et sæpiùs, ubi inter Chymicæ artis magistros non jam eâ de re disceptatur, recentiorem nomenclaturam interseruimus.

Ex igitur instrumenta artis; Artem verò ipsam nullatenùs! Perversè enim de re nostrâ sentiunt, si qui vim Medi-

cinæ in novis perquirendis medicaminibus et formulis exarandis sitam esse credunt, neque artem satis increvisse putant, si quidquam in rerum naturâ intentatum inexpertumque reliquerint. Novimus equidem, certè non multos, scrutatores Naturæ sedulos, prudenter audaces, veritati potiùs studentes quam famæ, in experimentis periculosis difficilisque judicij, dum fausta, simulque infausta iniquo non pressa silentio, justâ lance perpenderent, medicam veris auxisse materiam divitiis, ipsasque venenorum insidias feliciter in salutis præsidia convertisse. Nostris tamen temporibus ista quorundam animis videtur ita insedissee vesania, ut nihil apud ægros actum arbitrentur, nisi commotis magnâ medicamentorum vi corporibus, naturæ minimè auscultantes, sed aleatoriæ medicinæ piacula veluti miracula ostentantes; ausi deserere vestigia *Hippocratis, Aretæi, Celsi, Fernel, Baillou, Sydenham, Stahl, Torti, Baglivi, Boerhaave, Hoffmann, Huxham, Pringle, Swieten, Stoll, Bordeu, Lorry, Barthez, etc.*, tantorum tantæque doctrinæ virorum! *Dii meliora piis, erroremque istum nulli mortalium!*

Nos verò meminerimus multò minùs medicamentis artem scientiamque nostram inniti, quàm medendi methodo ex ipsius naturæ studio comparatâ; neque novas securè et utiliter experiendo posse vias iniri, nisi perspectis servatisque OEconomix legibus, quarum phænomena perpetuò intueri sapientium est, quibus obsistere, quæ spernere argumentum est aut superbiæ juvenilis, aut turpis ignorantix.
